



釋迦如來應化錄

上二

波
5-02
2



門八
502
又



釋迦如來應化錄上目錄二

諸天讚賀	華嚴大法
觀菩提樹	龍宮入定
林間宴坐	四王獻鉢
二商奉食	梵天勸請
轉妙法輪	度富樓那
仙人求度	船師悔責
耶舍得度	降伏火龍

急流分斷

棄除祭器

竹園精舍

領徒投佛

迦葉求度

假孕謗佛

請佛還國

認子釋疑

度弟難陀

羅睺出家

須達見佛

請宮入宮

請天齋賢

華鬘大志

釋迦如來應化錄上二



釋迦如來應化錄上二

報恩寺沙門寶成編集

諸天讚賀

普曜經云於是欲界天王見於如來坐於樹下神通以達所願具足降魔怨敵堅大幢幡無極大仁為大醫王療眾疾患無極師子若於恐懼衣毛不豎調和心意滅除三垢成三達智越於四海扼一道蓋救護三界清淨梵志為棄眾惡則為比丘除諸愚冥何謂沙門越於六徑廣學無限名曰博聞德消塵勞成爲

勇猛度於彼岸所謂力者成十種力具足法寶見於
如來坐於樹下成無上道於是淨居諸天梵迦夷天
善梵天化自在天無憍樂天兜術天焰摩天初利天
及四天王虛空大地神天供養世尊普悉莊嚴一切
天地散花燒香豎諸幢幡歸命世尊以偈贊曰堅固
如金剛志強不可毀正使肌肉消骨髓盡無餘若不
成佛道終不起于座仁師子辭正建誓立威神余等
諸天神咸來得善利乃使最尊人魔所不照明我等
聞佛音皆勸助佛道

華嚴大法

佛華嚴經云爾時如來始成正覺在寂滅場與四十
一位法身大士及宿世根熟天龍八部一時圍繞如
雲籠日是時如來現盧舍那身說圓滿脩多羅名為
頓教此經有七處九會三十九品說世王妙嚴如來
現相普賢三昧世界成就花藏世界毘盧遮那如來
名號四聖諦光明覺菩薩問明淨行賢首并須彌山
山頂偈贊十住梵行發心功德明法并夜摩天夜摩
偈贊十行十無盡藏并兜率天兜率偈贊十回向十
地十定十通十忍阿僧祇壽量菩薩住處佛不思議
十身相海如來隨好普賢行如來出現離世間入法

界等品譬如日出先照高山次照幽谷乃至普照一切大地但山有高下照有先後如來出現世間亦復如是成就如是無量無邊法界智光先照菩薩次照緣覺次照聲聞次照決定善根衆生隨機受化然後普照一切衆生

觀菩提樹

莊嚴經云世尊初成正覺無量諸天皆悉稱贊如來功德爾時世尊觀菩提樹王目不暫捨禪悅爲食無餘食想不起于座經於七日欲界色界諸天子等手持金盆各執寶瓶盛滿香水來詣佛所頭面頂禮請

如來澡浴世尊受請浴已諸天子等各各奉獻天妙衣服燒天妙香散天妙花供養如來無量天龍人等各取如來澡浴之水以自洒身皆發道意諸天子等各還天宮所將餘水香氣不滅惟聞佛香不聞餘香心生歡喜發菩提心時有天子名曰普花曰言世尊世尊住何三昧於七日中結加趺坐身心不動佛言如來以喜悅三昧爲食而住由此定力於七日中結加趺坐不起于座爲居此處斷除無始無終生老病死故於七日觀樹不起至二七日周匝經行三千大千世界以爲邊際至三七日觀菩提樹目不暫捨斷

除生死得成佛道

龍宮入定

本行經云世尊向摩利支處而坐時迦羅龍王復有目真隣陀龍王詣於佛所自言我此宮殿已曾布施諸佛今日世尊受我宮殿憐愍我故少時住此佛受而坐經於七日不起時彼七日興雲注雨起大冷風雨不暫停遂成寒凍時諸龍王從宮殿出以其大身七重圍遶擁蔽佛身復以七頭垂世尊上作於大蓋巖然而住莫令世尊身體寒冷風濕諸虫觸世尊體時龍王化作年少婆羅門身在於佛前頂禮佛足而

白佛言我今不以恐怖燒亂如來但恐世尊身有冷風塵觸世尊體思惟是事覆世尊身爾時世尊告目真隣陀龍王言汝大龍王來受三歸并受五戒汝當長夜得安樂故時目真隣陀龍王即白佛言如世尊勅不敢有違其目真隣陀龍王即從佛所受三自歸依歸依佛歸依法歸依僧復受五戒於世間中最初龍王而得度也

林間宴坐

本行經云爾時世尊於龍宮定起有一天子神通自在身出大色最勝光明照彼尼拘陀樹以天光明自

照明明朗詣向佛所頂禮佛足即白佛言我於往昔為
牧羊子當於世尊為菩薩時在彼六年苦行之中曾
將乳汁淨心供養奉上世尊復折尼拘陀樹枝為作
蔭涼以此善根因緣即便命終得生三十三天為大
福德威力天子我今得是果報況今世尊得成無上
菩提唯願世尊今當為我還彼樹下受彼樹蔭隨意
安樂隣愍於我世尊聽許願往昔日牧羊子之所尼
拘陀樹下加跌而坐世尊往詣彼樹下入定七日不
動以解脫力受安樂故爾時世尊以過於彼七日之
後正念正知從三昧起告天子言汝天子來可從我

邊受三自歸并及五戒汝當長夜得安樂故而彼天
子受佛勅已即受三自歸及受五戒已時於世間最
初天中成優婆塞

四王獻鉢

本行經云世尊思惟過去諸佛皆悉持鉢而受於食
時四天王各從四方持四金鉢奉上世尊世尊不受
將四銀鉢世尊不受四頗黎鉢而亦不受四琉璃鉢
亦復不受四瑪瑙鉢而亦不受四磲磔鉢亦復不受
時毘沙門天王告餘天王言我念往昔青色諸天將
石鉢來奉我等白言今此石鉢仁等可用受食而喫

復有一天子來自我言慎勿於此石鉢受食宜應供
養此之如塔當來有佛出世號釋迦牟尼可將此鉢
持奉世尊時四天王速疾還宮各執石鉢盛滿天花
以香塗鉢來詣佛所共將四鉢奉佛白言唯願世尊
受此石鉢世尊復念此四天王以信通心奉我四鉢
我亦不合受持四鉢若受一人三人有恨我今總受
四王之鉢爾時世尊受四天王鉢已如是次第相重
安置左手受已右手按下神通力故合成一鉢堅牢
清淨四際分明

三商奉食

本行經云北天竺有二商主一名帝黎富婆二名跋
梨迦駕五百牛車路經乳汁林不遠而過車牛皆不
肯行時守林神謂商主言此處有佛始成正覺汝今
最宜在前將麩供養商主聞已即各將麩酪蜜和揣
至世尊前頂禮佛足白言願為我等受此麩酪蜜揣
世尊思惟過去諸佛皆持鉢器而受盛食時四天王
各持石鉢奉上世尊可用受食世尊受鉢已從二商
主邊受於麩酪蜜和之揣即便呪願如法而食食已
即告彼二商主言來從我受歸依佛歸依法歸依僧
復受五戒當令汝等長夜安樂獲大善利商主聞已

卽共白言如佛聖教我等不違卽使共受三自歸依
并受五戒於入世間最初得度商主白佛願乞一物
造塔供養世尊卽與二商佛身髮爪而告之言若見
此物與我無異商主受髮爪已頂禮世尊圍遶三匝
辭佛而去

梵天勸請

莊嚴經云爾時大梵天王與六十八拘胝梵衆來詣
佛所頂禮佛足白言世尊如來爲諸衆生求無上覺
今得成佛惟願世尊轉於法輪世尊默然觀察世間
念言我證寂靜涅槃之法爲人演說彼等皆不能了

知是故默然時大梵天王及帝釋天王乃至三十三
天衆頂禮佛已而請如來轉于法輪佛告梵王言我
證甚深微妙之法最極寂靜難見難悟非分別思惟
之所能解唯有諸佛乃能知之是故默然時大梵天
王觀摩伽陀國多諸外道等於地水火風空橫生計
度著於邪見以爲正道而彼衆生雖修邪道有應度
者今當度之唯願世尊爲此等衆生故轉于法輪世
尊以佛眼觀見諸衆生上中下根起大悲心轉下法
輪天王聞已卽於佛前忽然不見爾時地神告虛空
神唱言如來今受梵王勸請轉于法輪虛空神聞展

轉傳至阿迦尼吒天

轉妙法輪

因果經云世尊往波羅奈國至憍陳如摩訶那摩跋
波阿捨婆闍跋陀羅闍所止任處五人不覺互來執
事觀五人根堪任受道佛言憍陳如汝等當知五陰
盛苦生苦老苦病苦死苦愛別離苦怨憎會苦所求
不得苦失榮樂苦一切衆生不知苦本皆悉輪迴憍
陳如苦應知集當斷滅應證道應修世尊喚彼五人
善來比丘鬚髮自落袈裟著身即成沙門時世尊問
彼五人汝等比丘知色受想行識爲是常爲無常耶

爲是苦爲非苦耶爲是空爲非空耶爲有我爲無我
耶時五比丘問佛說是五陰無常漏盡意解成阿羅
漢果卽便共言世尊色受想行識實是無常苦空無
我地神歡喜唱言如來今日於此轉妙法輪展轉唱
聲至三十三天於是世間始有三寶如來大聖是爲
佛寶四諦法輪是爲法寶五阿羅漢是爲僧寶爲諸
天人第一福田

度富樓那

本行經云迦毘羅國有大婆羅門爲淨飯王作於國
師其家巨富多饒財寶有子名富樓那聰明第一具

解常陀等論與悉達太子同日而生本性厭離世間
志求解脫見太子出家即與朋友三十人往至雪山
苦行求道勇猛精進獲得四禪五通以天眼觀遙見
世尊在鹿苑中為諸天人說法謂朋友言可往見佛
修於梵行朋友荅言我等從命即共三十人從雪山
下到世尊所頂禮佛足乞求出家唯願世尊度脫我
等佛言當隨汝意從心所願既得出家乞受戒法各
各用心獨行獨坐勇猛精進不魯放逸恒任空閑正
心正信為欲求於無上梵行已盡諸欲見諸法相欲
修諸通即證彼法已斷煩惱得證梵行所作已訖不

受後有以心善得一切解脫皆成大德一切皆悉能
作大事利益衆生佛告諸比丘富樓那辨才無盡說
法人中最為第一

仙人求度

本行經云阿般提國有巨富婆羅門姓大迦旃延與
嚴熾王作國王師第二子名那羅陀其父令習常陀
論及諸呪術次子不久荅父習常陀諸論我已通解
今可為我集一切衆解諸常陀及以技能其父即集
大衆那羅陀解一切論長兄聞弟能通諸論心生惡
念欲害其命其父令次子往頻陀山阿私陀仙人處

洞解諸論以得四禪具五神通仙人不久命終那羅
陀以世利養貪戀着心無有正念不信有佛法僧有
伊羅鉢龍王商佉龍王爲夜叉金齊言彼城先有一
偈云在於何自在染着名爲染彼云何清淨云何得
痴名痴人何故迷云何名智人何會別離已名曰盡
因緣龍王至那羅陀仙所問此偈義不能解曉那羅
陀卽詣佛所諮問此義佛卽開解說種種法生大歡
喜乞求出家佛言善來入我法中修於梵行因其種
族本姓名大迦旃延

船師悔責

本行經云世尊安詳漸行從閉塞城至恒河岸河水
暴漲平流彌岸世尊欲度詣船師邊卽語船師言乞
願渡我向於彼岸船師報言尊者當與我度價然後
我當度於尊者世尊報船師言我今何處得有度價
但我除斷一切財寶設有見者觀於瓦石土塊無殊
我以此故無有度價船師復言尊者若不能與我度
價終不相濟世尊忽見一群鴈從恒河南岸飛空而
來向北而說偈言諸鴈群黨度恒河不曾問彼船師
價各運自身出已力飛空自在隨所之我今應當以
神通騰空翱翔猶彼鴈若至恒河水南岸安隱定住

如須彌時彼船師見佛過已心生大悔我觀大聖福田而不知施度至彼岸如是念已悶絕躡地良久乃蘇從地而起即詣摩伽陀王頻頭王邊奏如是事王聞此事已即勅船師從今已去凡是出家之人求欲度者勿取價直

耶舍得度

因果經云有長者子名耶舍有大辯才聰明智慧於中夜分見空中光明尋光詣鹿野苑見佛三十二相八十種好禮佛自言唯願世尊救濟於我佛言色受想行識無常苦空無我汝知否答言實是聞是語已

得法眼淨成阿羅漢願求出家佛言善來比丘即成沙門時耶舍父尋子耶舍至於佛所佛以神力隱其耶舍而為說法善男子色受想行識無常苦空無我汝知否耶舍父聞已遠塵離垢見於道跡如來問言何緣至此答言尋子佛攝神力父子相見心大歡喜佛即授三自歸為最初優婆塞又有耶舍朋類五十長者子聞耶舍出家共詣佛所願求出家佛言色受想行識無常苦空無我汝知否聞已漏盡意解佛言善來比丘即成沙門是時始有五十六阿羅漢佛告比丘汝等堪為世間作無上福田宜各遊方教化以

慈悲心度諸衆生
降伏火龍

因果經云世尊念言優樓頻螺迦葉有大名稱我當
詣彼教以正法即往尋之日既將暮佛語迦葉欲於
石室止住一宿迦葉言石室中有毒龍恐相害耳佛
言雖有毒龍但以見借迦葉言若能住者便自隨意
爾時如來即入石室結加趺坐而入三昧爾時毒龍
舉體烟出世尊即入火光三昧佛亦出烟龍火瞋怒
身中出火佛亦出火二火俱熾焚燒石室迦葉夜起
見室盡然驚怖歎惜此大沙門端正尊貴不取我語

今爲火龍之所燒害遠令弟子以水澆之火不能滅
火更熾盛爾時世尊以神通力制伏毒龍授三歸依
置於鉢中明且持鉢盛龍而出迦葉師徒白言世尊
龍火猛烈之所傷耶佛言我內清淨終不爲彼外災
所害彼毒龍者今在鉢中即便舉鉢以示迦葉迦葉
師徒見於世尊處火不燒能降毒龍置於鉢中迦葉
歡喜歎未曾有

急流分斷

普曜經云世尊至泥連禪河水流激疾佛以神通斷
水令住使水分開佛行其中迦葉見之畏佛所漂即

令弟子乘船取佛佛卽從水中貫船底入無有穿迹
迦葉稽首願作沙門佛言且還報汝弟子迦葉受教
告諸弟子我受佛戒欲作沙門諸弟子曰願皆隨從
得作沙門於是師徒脫衣棄褐及水瓶杖屨諸事火
具悉棄水中俱詣佛前稽首白言今我五百人皆有
信意願作沙門佛言善來迦葉五百人剃除鬚髮皆
成沙門迦葉二弟次名那提幼名竭夷各有二百五
十弟子廬舍水邊見諸梵志事火之具隨水下流恐
兄五百人大水所漂卽令五百弟子順流而上見兄
師徒皆作沙門卽問大兄我意以兄爲是羅漢并五

百人共同聲言願如大師求作沙門佛言善來二弟
及五百弟子剃除鬚髮皆成沙門佛今便有一千沙
門隨從而行

棄除祭器

本行經云爾時三迦葉有一外甥螺髻梵志名優波
斯那在阿脩羅山中共二百五十弟子脩學仙道彼
聞其舅迦葉三人及諸弟子俱投佛聖悉皆出家來
至舅前而說偈言舅等虛祀火百年亦復空行彼苦
行今日同捨於此法猶如蛇蛻於故皮優波斯那告
諸弟子我今欲往佛所修於梵行汝意云何弟子答

言我等亦當隨從俱詣佛所白言我今願將弟子入
佛法中當修梵行佛言當自取汝鹿皮之衣及祭火
器悉皆擲棄諸梵志言奉教不違卽至居處將祭火
具盡皆棄毀還至佛所願求出家世尊聽許卽爲彼
等增更說法還以三種神通示教利喜是時衆等於
無爲法悉盡諸漏心得解脫爾時世尊聚集諸比丘
衆所謂此等二百五十人俱並悉從於梵志出家皆
阿羅漢而得爲首最勝最妙最上最尊卽得自利隨
侍世尊證會說法

竹園精舍

因果經云世尊卽與優樓頻螺迦葉兄弟三人及千
比丘往王舍城請頻婆娑羅王諸王與百官出城迎
佛佛爲說法大王此五陰身以識爲本因於識故而
生意根以意根故而生於色而此色法生滅不在如
是觀者善知無常如此觀身不取身相則色離我及
以我所若能觀色離我所卽是色生便是苦生若
知色滅便是苦滅若人能作如是觀者是名爲解脫
王聞法已群臣人民得法眼淨時王白言我從今日
皈依世尊及比丘僧當令四事不使乏少惟願世尊
住於竹園佛言大善王勅諸臣住於竹園起諸堂舍

惟願世尊往住於彼卽與比丘及無量諸天前後圍
遶作諸技樂與王俱往竹園時王手執寶瓶盛以香
水於如來前而作是言我今以此竹園奉上如來及
比丘僧唯願哀愍爲我納受諸王見佛最爲其首諸
僧伽蓋最爲始也

領徒投佛

因果經云王舍城中有二婆羅門聰明智慧一名舍
利弗一名目犍連各有一百弟子二人共爲親友極
相愛重咸共誓言若先得聞妙法速相關示時舍利
弗忽於路次逢見阿捨婆耆比丘入城乞食威儀序

序卽便問言汝師何人有所教誡演說何法比丘答
言我師是甘蔗種天人之師相好智慧及以神通無
與等者我旣年幼學道日淺豈能宣說如來妙法然
以所知當爲汝說卽說偈言一切諸法本因緣生無
至若解此法者則得真實道舍利弗聞已卽於諸法
遠塵離垢得法眼淨時舍利弗還至在處時目犍連
見舍利弗諸根寂定卽便問言必聞妙法舍利弗具
如上說目犍連聞已得法眼淨卽將二百弟子往詣
竹園遙見如來相好端嚴心生歡喜願求出家佛言
善來度爲沙門爾時世尊與千二百五十人於摩竭

提國廣度衆生

迦葉求度

因果經云偷羅厥又國有一婆羅門名曰迦葉極大智慧誦四帝陀論其家巨富善能布施其婦端正舉國無雙夫婦二人無有欲想不樂在家厭離世間思惟求訪出家之法卽捨家業入於山林心念口言諸佛如來出家修道我今亦當隨佛出家卽便脫去金鏤織衣而著壞色衲衣自剃鬚髮爾時諸天於虛空中旣見迦葉自出家已報言迦葉甘蔗種族淨飯王予其名薩婆悉達出家學道號爲釋迦牟尼佛今在

竹園中住迦葉聞天語已卽便往詣竹園世尊知其當來直往度之卽行遂逢迦葉迦葉卽便頂禮佛足白佛言是我大師我是弟子佛言迦葉當知五陰色身是大苦聚迦葉聞已卽便見諦乃至得於阿羅漢果爾時世尊卽與迦葉俱還竹園以此迦葉有大威德天人所重故名大迦葉乃至佛滅住持法化被於來世此人之力也

假孕謗佛

處胎經云世尊初成佛道未久六師與盛吾有弟子一千二百五十人皆得羅漢六通無礙時有旃遮摩

那者女是阿闍羅迦舍欽婆羅弟子受師明教日來
佛所外現清信女法內心受邪師教來往周旋欲令
人見以草作腹月漸令大後以木盂繫腹猶如臨產
婦女時邪師問言汝那得此身答言我日日往瞿曇
沙門所故有此身師即噴言誑我弟子我此弟子垂
當往梵天者辱我弟子乃至於此是時邪師將諸弟
子并此女人往至佛所當於爾時如來與無量數衆
而爲說法梵志至佛所高聲唱言此沙門瞿曇犯於
姪欲實不得道所作神變皆是幻術非真實道拍此
女人言衆生咸見不也愛我此女使冷有娠發此語

已時天帝釋化作黃鼠在女裙內嚙孟繩斷令孟落
地衆人皆見衆人同聲罵言汝等邪師徒衆毀謗聖
人造如斯罪

請佛還國

莊嚴經云時父王聞子得道已經六年語優陀夷言
汝今可往請佛還國離別已來十有二年思欲一見
優陀夷受教即詣佛所具述王意已願爲沙門得阿
羅漢道世尊思惟爾乃還國當度父母即語優陀夷
汝宜先往現十八變王大歡喜即勅群臣萬民出城
四十里奉迎如來世尊威儀端嚴自在父王白言離

別多年今得相見大臣百官稽首作禮見諸沙門親
近侍從卽勅國內豪族選五百人度爲沙門侍佛左
右佛弟難陀亦爲沙門難陀所使名優波離前白佛
言人身難得佛法難值諸尊貴者皆棄世榮我身卑
賤何所貪樂惟佛慈悲願見救度許爲沙門佛言善
來度爲沙門隨例而坐難陀作禮到優波離不禮佛
告難陀佛法如海容納百川四流歸之皆同一味授
戒之後不在貴賤四大和合假名爲身本無吾我勿
生憍慢難陀遂作禮

認子釋疑

莊嚴經云時佛入宮坐於殿上王及臣民日日供養
百種甘饌佛爲說法度無量衆耶輸陀羅携羅睺羅
來稽首佛足瞻對問訊而白佛言久違侍奉曠廢供
養時諸釋種眷屬皆有疑心太子去國十有二年何
從懷孕生羅睺羅佛語父王及諸羣臣耶輸陀羅守
節貞潔清淨無有瑕疵若不信者今當取證爾時世
尊化諸比丘皆悉如佛相好光明等無差異於時羅
睺羅年已七歲時耶輸陀羅卽以指印信環與羅睺
羅而語之言是汝父者以此與之羅睺羅應時直詣
佛所以印信環而奉世尊王及羣臣咸皆歡喜歎言

善哉羅睺羅真是佛子佛語父王及諸臣曰從今已後無復懷疑此吾之子緣吾化生勿咎耶輸陀羅也爾時世尊爲王說法卽時得道群臣萬姓後宮采女咸受戒法月六齋年三齋淨修梵行國內清寧風雨以時萬邦來賀

度弟難陀

寶藏經云佛至難陀舍乞食難陀作禮取鉢盛飯奉佛佛不受鉢隨佛至精舍佛逼難陀剃頭難陀恒欲還家佛不聽許待佛出去異道而歸佛卽異道而來遙見佛來大樹後藏佛卽舉樹在空佛見難陀將還

精舍佛將難陀至初利天上遍諸天宮觀看見一宮中有諸天女無有天子難陀遂問何以此宮獨無天子荅言難陀出家命終當生於此天宮難陀便欲卽住天女告言我等是天女今是人還捨人壽更生此間佛將難陀復至地獄見諸鑊湯悉皆煮人唯見一鑊炊空佛停難陀卽問獄卒荅言難陀以出家功德當得生天以欲罷道命終墮此地獄是故我今炊鑊而待難陀恐怖畏獄卒卽作是言南無佛陀願佛擁護將我還至精舍佛語難陀汝勤持戒修汝天福難陀荅言不用生天唯願我莫墮此地獄佛與說法

三十七日中成阿羅漢

羅睺出家

未曾有因緣經云佛在迦毗羅衛國世尊遣目連白
父及耶輸曰太子羅睺年已九歲應令出家耶輸答
曰如來為太子時娶我為妻未滿九年逃至山澤勤
苦六年得佛還國今復欲求我子出家何酷如之時
目連方便喻曉絕無聽意世尊即遣淨居天子空中
告曰汝頗憶以五百銀錢買五莖蓮花上定光佛時
汝求我世世為妻我言菩薩屢劫行願一切布施不
逆人意汝能爾者聽為我妻汝立誓願隨君施與誓

無悔心而今何故愛惜羅睺不令出家耶輸聞已還
識宿命如昨所見愛子之情自然消歇捉羅睺手付
囑目連時淨飯王即集國中豪族各遣一子隨從我
孫有五十人往到佛所使阿難與其剃頭及五十諸
王公子命舍利弗為其和尚目連為阿闍黎羅睺不
樂聽法佛為說未曾有因緣得受十戒袈裟著身即
成沙門遂證四果

須達見佛

賢愚經云舍衛國王有大臣名須達居家巨富賑濟
貧乏及諸孤老因名給孤獨為覓娶婦到王舍大城

中大臣護彌家宿其家大設供具廣辦飲食須達問
言長者令暮躬自執勞營辦飲食欲請何人答言請
佛及僧須達聞佛僧名心情悅豫問言云何名佛答
言淨飯王子悉達初生之時卽行七步舉手而言天
上天下唯我獨尊見老病死苦出家修道六年苦行
得一切智故名佛也又問云何名僧答言佛成道已
梵天勸請說法爲憐陳如五人轉四真諦漏盡結解
便成沙門能爲衆生作良福田故名僧也須達聞已
卽生信心企望至曉當往見佛至曉到世尊所世尊
知須達來出外經行須達見佛猶如金山相好威容

儼然矚著倍加心悅頭面作禮胡跪合掌問訊起居
是時世尊卽爲說法四諦微妙苦空無常聞法歡喜
便染聖法成須陀洹

釋迦如來應化錄上ノ二

終

及後... 德及... 言... 上天... 警... 警... 警...

對樂... 吳... 謝...

